

Intenshon

Na Boneiru tin hopi entidat ligá na gobièrnu. Esakinan ta hopi importante pa ekonomia di Boneiru i pa bida sosial normal. Meskos ta konta ademas pa Kòrsou, Aruba i St.Maarten. Akinan ta trata por ehèmpel di aktividatnan di haf, telekomunikashon, aeropuerto i suministro di awa i energia i konstrukshon di bibienda. Den tur e entidatnan akí gobièrnu (lesa: polítika) tin un ròl mayó òf menor. Na St.Maarten i Kòrsou nan a purba den kuadro di e desmantelashon na 2010 pa redusí e influensia polítiko den e empresanan akí. Pa esaki bo ta haña e Ordenansa Nashonal i e Kódigo di Corporate Governance den e paisnan akí, pa deficiente ku nan por ta.

Na Boneiru esakinan ta funshoná mas fututu ainda ku na Kòrsou i St.Maarten. Esaki ta remarkabel den un Hulanda ku ta asina perfektamente regulá. Na Boneiru a keda sin lanta e instituto di un konsehero di corporate governance. Ta un ròl limitá tin reservá pa e Representante di Reino den nombramentu di atministradó- i supervisornan, nada mas. Esaki ta pone ku e entidatnan boneriano ligá na gobièrnu ta na mèrset di e kaprichonan di polítikonan ku kasualmente ta na mando. Tin biaha ta personanan ku ta komprondé ku entidatnan ligá na gobièrnu mester por hasi nan trabou riba un distansia for di polítika. Tin biaha tin ménos kompreshon pa esaki.

Regularmente sa sosodé ku ta e akshonista mester tuma desishonnan importante. Na Boneiru e akshonista di e entidatnan akí ta OLB, representá pa BC den esaki, bou di responsabilidad di Konseho insular. Di e manera akí BC por influensia realisashon di desishonnan importante. Tambe dor di keda sin hasi nada. Akinan ta bai pa nombramentu di atministradónan por ehèmpel. Un (re)nombramentu di komisarionan tambe mester keda realisá dor di e akshonista (representá pa BC). Kiko ta sosodé awor si esaki no hasié? Simplemente no ta konvoká un reunion di akshonista pa realisá e (re)nombramentunan nesesario i kiko awor? Pa e empresanan konserní esaki ta un desaster. Si un atministradó tuma su retiro i no nombra un atministradó nobo (i adekuá) lihé, e ora ei e empresa, bo a rei kaba, ta mira inmanehabel. Si e término di nombramentu di komisarionan a pasa i no renombrá e komisarionan akí, e ora ei tambe e empresa ta bira inmanehabel. Kon por tin un tumamentu di desishon bálido si ta solamente un òf dos komisario tin na lugá di minimalmente e tresnan preskribí segun statuto? Direktiva ta paralisá e ora ei. T'asina ku pa tur desishon importante fihá segun statuto mester di pèrmit delantá di e hunta di komisario. I si esaki no t'ei?

Kasi sigur bo ta pensa 'Ai, kosnan lo resolvé nan mes, na kuminsamentu di aña nan ei!'. Enbèrdat. Pero ora awa no ta sali fo'i kranchi mas lo bo no pensa esei mas. E entidatnan ligá na gobièrnu akí ta sumamente importante pa bo ekonomia, sea ku bo ta biba na Boneiru, Aruba òf Kòrsou. Ke men, bo tin mag di ferwagt di bo representantenan polítiko ku nan lo asumí nan responsabilidad. Ta na bo interes pa nan sòru pa nombra hende kapasitá na tempu den e empresanan ku ta asina importante

pa bo funshonamentu diario.

Kiko awor si esaki simplemente no ta sosodé? Kódigo sivil na Boneiru, Kòrsou i St.Maarten ta determiná den artíkulo 2:7 ku esnan ku ta envolví den maneho i supervishon den e persona hurídiko, mester komportá nan mes di akuerdo ku reglanan di bon fe pa ku otro. Mi ta kere ku un BC ku no ta asumí su responsabilidadat komo akshonista, mester keda fòrsá pa wes sivil pa konvoká un reunion di akshonista si esaki ta nesesario pa eksistensia di un empresa.

Bo sa kiko ta e kos di mas prèt? No ta eksistí literatura òf hurisprudensia riba esaki. Bo sa dikun no? Niun kaminda na mundu ku eksepsion di akinan un akshonista lo no laga un empresa bai sawaka deliberadamente. Un kos ta bon kla. E kondukta akí no ta na interes di pueblo, e no ta na bo interes. P'esei e akshonista den e entidatnan ligá na gobièrnu akí mester mobilisá i asumí su responsabilidadat. Un bon intenshon pa 2018! Felis Aña!